

ficia ad eorum intentionem oblata, ut videre est apud P. Petau, t. III, dogm. I. 3, cap. 8, n. 15; verum hæc singularis opinio nullo innixa fundamento, explodenda est velut absurdæ. Imo, cum quidam concionator hanc emisisset sententiam, ex resolutione S. Cong. Inquisitionis ab Innocentio X approbata, coactus est se retractare: *Ferraris, vœ Missæ sacrificii*, art. 7, n. 20.

11º Ad saecram Cong. Concil. delata est quæstio quam non resolvit, an scilicet ante mortem celebrare vel celebrari facere liceat Missas de *Requiem*, pro suffragio animæ suæ, per anticipationem. S. Congregatio autem Rit. declaravit, die 28 martii anni 1775, Missam de *Requiem* pro persona adhuc vivente, per anticipationem celebrari non posse. *Gardell.*, t. V, p. 8<sup>4</sup> et 8<sup>5</sup>.

## CAPUT QUINTUM.

### DE MINISTRO SACRIFICII MISSÆ.

Christus principalis est offerens in sacrificio Missæ. « Idem nunc offerens sacerdotum ministerio, qui seipsum » tunc in cruce obtulit, » ait concil. Trid. sess. 22, cap. 2. « Per hoc et sacerdos est, ipse offerens, ipse et oblatio, » inquit S. Aug. de Cœnitate Dei, l. 10, cap. 20, t. VII, col. 156.

*Probavimus in prima parte* solum sacerdotem esse ministerum Eucharistiae sacramenti quoad confectionem: inde sequitur eum solum Missæ sacrificium valide offerre posse. Circa hoc punctum nullum moveri potest, nec de facto movetur dubium.

Simplices tamen fideles aliquo sensu dici possunt Missæ sacrificium offerre, quatenus videlicet oblationem a sacerdote factam approbant, ei consentiunt, et Christo victimæ cordis affectu conjunguntur. Unde in canone legitur: *Memento, Domine, famulorum famularumque tuarum.... pro quibus tibi offerimus vel qui tibi offerunt hoc sacrificium laudis, pro se suisque, etc.*

Dispositiones in sacerdote requisitas ad licite celebran-

dum, supra descripsimus, agendo de dispositionibus ad suscipiendam Eucharistiam necessariis. Nunc specialiter nobis agendum est 1º de obligatione quām habent sacerdotes Missam celebrandi; 2º de frequenti celebratione; 3º de obligatione fructum Missæ applicandi; 4º de stipendio et obligationibus ex stipiendo nascentibus.

### ARTICULUS PRIMUS.

#### DE OBLIGATIONE QUAM HABENT SACERDOTES MISSAM CELEBRANDI.

1º Longe communius docent theologi, v. g., S. Th., Suarez, Layman, Bonacina, Concinna, Habert, Juénin, Collat contra card. de Lugo et nonnullos alios, omnes sacerdotes, non legitime impeditos, teneri sub peccato mortali saltem aliquando celebrare; idque concludunt 1º ex verbis B. Pauli, Hebr. v, 1: *Omnis namque pontifex, ex hominibus assumptus, pro hominibus constituitur in iis quæ sunt ad Deum, ut offerat dona et sacrificia pro peccatis;* 2º ex verbis Christi, *Hoc facite in meam commemorationem:* quæ verba, ex concilio Trid., sess. 22, cap. 1, verum continent præceptum; 3º ex Decretal. l. 3, tit. 41, cap. 9, ubi Innocentius III fortiter arguit sacerdotes qui *Missarum solemnia vix celebrant quater in anno;* 4º auctoritate S. Pii V, qui contradictoriæ opinionem ex operibus Cajetani eam defendantis expungi jussit, referente S. Ligorio, l. 6, n. 213, dub. 4.

2º Non sibi consentiunt theologi quoties in anno celebrare teneatur sacerdos, ut non peccet mortaliter. « Saltem videtur quod celebrare teneatur in præcipuis festis, et maxime in illis diebus in quibus fideles communicare consueverunt, » inquit S. Th., 3 part., q. 85, art. 10, conclus. Præcipua autem festa in quibus fideles communicare consueverunt, sunt Nativitas Domini, Pascha et Pentecostes, ut explicatur apud Bened. XIV, l. 3, cap. 1, n. 5 et 6.

Concilium Trid., sess. 23, de Refor. cap. 14, sic habet.

« Curet episcopus ut ii saltem diebus dominicis et festis solemnibus; si autem curam habuerint animarum, tam frequenter, ut suo muneri satisfaciant, Missas celebrent. » S. Car. Bor., concilio Mediol. I, tit. de freq. divini Sacrificii Oblatione, auctoritate concilii Trid. in nixus, omnibus sacerdotibus, cujuscumque gradus, dignitatis et conditionis, præcipit ut his diebus celebrare non omittant. Hinc Bened. XIV, l. 3, cap. 1, n. 9, concludit dari obligationem sub peccato, pro sacerdote non impedito, singulis diebus dominicis et festivis celebrandi: sed definire non vult an illa obligatio sit sub veniali tantum, an sub mortali.

Longe probabilius videtur aliquas hujus generis omissiones, sine causa excusante, esse duntaxat peccata venialia, modo audiatur Missa, et extrinsecæ rationes frequentiorem non expetant celebrationem: imo S. Ligoriū ut multo probabiliorem habet sententiam quæ docet sacerdotem non teneri, sub peccato mortali, celebrare pluries quam ter aut quater, in solemnioribus festis. Pius sacerdos periculo mortaliter in hoc genere peccandi nunquam se committet.

3º Qui curam habent animarum, Missam celebrare tenentur singulis diebus dominicis et festis de præcepto: his quippe diebus fideles Missam audire tenentur: et, quantum *commode fieri potest*, in propria parochia ad audiendum Verbum Dei, juxta concil. Trid., sess. 24, cap. 4 de Reform. Verum obligatio Missam audiendi, supponit in pastore strictam obligationem eam celebrandi per se vel per alium. Unde qui celebrare non vult, vel si est impeditus, curare debet, juxta communiorum opinionem, ut aliis pro se Missam parochiale celebret; sic Bened. XIV, l. 3, cap. 3, n. 6. Excusari igitur non potest parochus qui, legitimate non impeditus, Missam die dominica omittit celebrare, vel, absque licentia episcopi, propriam deserit ecclesiam, et causa est cur fideles præcepto audiendi Missam satisfacere nequeant.

4º Vicarii, eo ipso quod ab Ordinario in una collocati sunt parochia ut parochi sint coadjutores, obligationem

habent Missam saltem diebus dominicis et festivis celebrandi, ut fideles facilius Sacro assistant.

Insuper parochi et vicarii celebrare tenentur, quando exercere debent functiones Missam requirentes, v. g., sponsalia celebrare, mortuos sepelire, officia mortuorum peragere, etc.

#### ARTICULUS SECUNDUS.

##### DE FREQUENTI CELEBRATIONE MISSÆ.

1º S. Bonaventura, de Præparatione ad Missam, cap. 5, ait: « Sacerdos qui non celebrat, quantum in ipso est, privat Trinitatem laude et gloria, Angelos lætitia, peccatores venia, justos subsidio et gratia, in purgatorio existentes refrigerio, Ecclesiam Christi speciali beneficio, et seipsum medicina et remedio contra quotidiana peccata et infirmitates. » Idem ferme habet auctor exquisiti operis de Imitatione Christi, l. 4, cap. 5, in fine. Suarez et multi theologi cum illo statuunt « ad spiritum Ecclesiae proprius accedere et convenientius esse singulis diebus Sacrificium facere, idque sacerdotibus inculcandum. » Bened. XIV, l. 3, cap. 2, n. 1.

2º Plurimi tamen allegant frequentiam generare indifferentiam; quod raro fit, pretiosius fieri; in primordiis Ecclesiae non ita sæpe, sed majori cum devotione Missam celebrari consuevit; sacerdotes qui rarius celebrant, sensibiliori compunctione cordis et multis cum lacrymis Sacrificium offerre, et denique pios animarum rectores consilium sacerdotibus dare ut aliquoties Missam omittant, nec quotidie celebrant.

3º His rationibus Bened. XIV respondet 1º melius quidem esse quotidie vel frequentissime celebrare, sed bene semper et cum dispositionibus requisitis celebrandum esse; 2º Apostolos eosque qui Apostolis proxime successerunt, frequenter vel etiam quotidie celebrasse; et id probari posse, tum ex Act. n, 46: *Quotidie perdurantes unanimiter in templo, et frangentes circa domos panem*; tum ex S. Cypr., Epist. 54: « *Episcopatus nostri honor grandis*

» et gloria est pacem dedisse martyribus, ut sacerdotes  
» qui Sacrificia Dei quotidie celebramus, hostias Deo et  
» victimas præparemus; » tum ex pluribus aliis testimoniis quæ hic referre longius esset. 3º Quoad sensibilem devotionem et lacrymas, negat eas esse donum quo necessario careant qui frequentius celebrant, vel dispositionem ad digne celebrandum requisitam; citat testimonium Joannis *Gerson*, qui docet satis esse, ad Missam digne celebrandam, si sacerdos, post discussam diligentem examine suam ipsius conscientiam, moraliter certus sit se esse in statu gratiæ, nec omnem fervoris aut attentionis defectum obstarre quominus Missa digne celebretur.

4º Sacra Cong. Rituum, per decretum diei 11 februarii 1690, ad Alexandro VII die 11 martii approbatum, sic statuit: « In sabbato sancto, etiamsi occurrat festum Annuntiationis B. Mariæ Virginis, celebratio Missarum privatuarum omnino prohibetur, in quibuscumque ecclesiis et oratoriis tam publicis quam privatis, non obstante quacumque consuetudine, sed unica tantum Missa conventualis una cum officio hujus diei celebratur. » Alia citantur decreta ejusdem Cong. in eodem sensu, et Bened. XIV, l. 4, cap. 3, n. 10, contendit nullam esse causam cur eis non pareatur.

Ex variis S. Cong. Rit. decisionibus, citatis vel relatis apud *Merati* in *Gay.*, t. II, part. 4, p. 110, et *Gardell.*, n. 1843, prohibitum est ne celebrentur Missæ privatæ, feria V in Coena Domini, in quacumque ecclesia vel oratorio. Missa solemnis permittitur in solis ecclesiis in quibus asservanda est sacra Eucharistia.

Feria igitur V in Coena Domini, omnes sacerdotes Missæ majori assistunt et de manu celebrantis sacram suscipiunt communionem, in memoriam institutionis sanctissimi hujus sacramenti. Feria VI in Parasceve, sola Missa præsanctificatorum permittitur.

Alius non est dies in anno in quo celebrare non liceat.

5º Juxta veterem disciplinam, usque nunc per orbem catholicum vigentem, singuli sacerdotes tres celebrare possunt Missas in festo Nativitatis Domini. Mos ille ad

Telesphorum papam, versus medium secundi saeculi existentem, juxta plures, ascendit, quod alii judicant improbabile: quidquid sit, certum est illum exstitisse tempore S. Gregorii, qui, l. 4, Homil. 8 in *Evang.*, aiebat: « Quia, largiente Domino, Missarum solemnia ter hodie celebratur sumus, loqui diu de Evangelica lectione non possumus. »

Celebrari solebant una in media nocte, altera ad auroram, et tertia in die; sic in Missalibus inscribuntur, et ita celebrari debent in cathedralibus, collegiatis et parochialibus ecclesiis, ut populus eis alternatim assistere possit.

Ex multis sacræ Rit. Cong. decisionibus, una tantum diei potest Missa nocte in singulis ecclesiis. Aliæ celebrari non debent ante auroram. Vide *Merati*, part. 4, tit. 3; *Caval.*, t. IV, p. 35; *Gardell.*, t. V, p. 108. S. Cong., sub die 18 sept. 1781, declarat « contrariam consuetudinem esse abusum » ab episcopo reformatum. Hæc tamen consuetudo apud nos generaliter subsistit. Vide quæ dicturi sumus t. IV, Tract. de *Legib.*, part. 2, cap. 2, art. 5.

6º Olim plures Missas aliis diebus celebrare licebat; sic S. Albertus, monachus, factus presbyter, duas in die celebrabat Missas, unam pro vivis et alteram pro defunctis. Leo III, summus Pontifex in fine octavi saeculi, septem in eodem die, et aliquando novem celebrare consueverat Missas (*Fleury*, l. 46, n. 20, et *Bened.* XIV, l. 3, cap. 4, n. 12). Concilium Selengstadense, prope Moguntiacum, anno 1022, can. 6, prohibuit ne sacerdos plus quam tres celebraret Missas in eodem die. Alexander II, in Decreto, 3 part., dist. 1, can. 53 relatus, declaravit sufficere sacerdoti unam Missam una die celebrare. Innocentius III, Decretal. l. 3, tit. 41, cap. 3, consulenti responderet: « Quod, excepto die Nativitatis dominicæ, nisi causa necessitatis suadeat, sufficit sacerdoti semel in una die Missam solummodo celebrare. »

7º Parochi qui duas simul habent parochias, si populus in alterutram convenire non possit, et alius desit sacerdos qui Missam celebret, duas Missas singulis dominicis et festivis diebus celebrare possunt, ex licentia

episcopi, juxta plurimos, vel ex jure communi, ut alii multi dicunt. Omnes fatentur rem fieri non posse inscio episcopo, qui perspicet an necessitas sic agendi revera existat.

Episcopus autem duplici hujusmodi celebrationi consentire non potest, ex pluribus conciliis provincialibus et ex resolutione Congr. Episc. et Regul. a Bened. XIV, l. 3, cap. 5, n. 4, citata, nisi sub sequentibus conditionibus : 1º ut ipsius iudicio vera existat necessitas, locorum natura, vel sacerdotum paucitate, vel infidelium persecutione fundata; 2º ut in prima Missa, post sumptionem corporis et sanguinis Domini, ablutiones non sumantur, sed post secundam Missam sumendae reserveruntur; 3º ad breve tempus et personae tantum alicujus sacerdotis concedatur, non vero tanquam privilegium alicui parochiae adnectatur; 4º pro solis diebus dominicis et festivis tribuatur; 5º in diversis tantum ecclesiis dueae Missæ celebrentur.

Qui tali potiuntur facultate, officium diei Veneris in Parasceve bis celebrare non possunt, quia post Missam præsanctificatorum jam non sunt jejuni.

8º Bened. XIV, l. 3, cap. 5, n. 6, testatur nullum in Ecclesia Orientali reperiri monumentum quo appareat sacerdotem uno eodemque die plures Missas celebrasse; imo, in ea ecclesia prohiberi ne quis sacerdos eodem die Missam celebret ad altare in quo alias celebravit, nisi gravis necessitas aliter fieri postulet. Sed plura esse possunt altaria in eadem ecclesia, vel plures sacerdotes in eodem altari simul celebrare possunt.

9º Ex veteri consuetudine, quilibet sacerdos sacerdotalis binas, et regularis ternas Missas celebrare solebat, in die Commemorationis fidelium defunctorum, per totum Aragoniæ regnum. Ad preces Ferdinandi VI et Joannis V, Hispaniarum et Portugaliæ regum, Bened. XIV, ut ipse narrat l. 3, cap. 4, n. 11, omnibus presbyteris, tam sacerdotalibus quam regularibus, in utriusque regis dominiis existentibus, concessit facultatem, ante se pluries negatam, ut, die Commemorationis omnium fidelium defunc-

torum, tres Missas celebrare possent, etiam duabus horis post meridiem, ea conditione ut omnibus fidelibus defunctis, sine quacumque eleemosyna, applicarentur.

### ARTICULUS TERTIUS.

#### DE OBLIGATIONE APPLICANDI FRUCTUM MISSÆ.

1º Omnes qui curam habent animarum tenentur jure divino Missam, saltem aliquando, pro oibis suis offerre, ut docet concil. Trid., sess. 23, cap. 1 de Reform. « Cum præcepto divino mandatum sit omnibus quibus animarum cura commissa est, oves suas agnoscere, pro his » Sacrificium offerre, etc. » Non dicit ante eos celebrare, ut Sacro assistant, sed pro eis offerre, id est fructum sacrificii eis applicare. Cum autem non exprimat quoties hæc applicatio fieri debeat, sacra ejusdem concilii Congr. definit per decretum 10 maii 1681, ab Innocentio XII die 24 aprilis 1699 approbatum, eos qui pingues habent redditus, singulis diebus, et qui tenues, saltem diebus festis Missam pro oibis applicare teneri.

2º Verum Bened. XIV, ut difficultatibus ex distinctione inter pingues et tenues redditus nascentibus occurreret, per Constit. *Cum semper*, diei 19 augusti 1744, Bullar. t. 1, statuit 1º omnes curam animarum habentes, quo nomine intelliguntur parochi et vicarii, sive perpetui, sive ad tempus, Missam pro populo sibi commisso applicare teneri singulis diebus dominicis et festivis, in quibus Missa ex præcepto audienda est, etiamsi congruentes non haberent redditus; 2º parochos pauperes dispensationem ab Ordinario obtinere posse, ut ipsis liceat etiam diebus festis Missam applicare pro eleemosynam offerentibus, modo intra eamdem hebbdomadam Missas omissas populo applicent; 3º patriarchales, metropolitanas, cathedrales et collegiales ecclesias Missam conventualem quotidie pro benefactoribus in genere applicare teneri, et per Missam pro aliquo benefactore, vel pro benefactoribus in genere oblatam, sed alio titulo debitam, obligationi Missæ conventionalis non satisfieri; 4º canonicum parochum, vel alias onere

Missarum gravatum, si Missam conventualem celebret, eam pro benefactoribus applicare teneri, et per alium supplere Missas quibus specialiter manet adstrictus.

3º S. Cong. concil. Trid. interpres pluries respondit, notanter die 14 junii 1841 nobis et die 22 nov. ejusdem anni archiepiscopo Turonensi, curam animarum habentes fructum Missæ populo sibi commisso applicare teneri diebus festis perindultum apostolicum diei 9 aprilis 1802 reductis.

Eodem sensu jam responderat dicta sacra Cong. die 28 martii 1801 relative ad festa iisdem ferme vocibus reducta a Pio VI in statibus ecclesiasticis. Intentio igitur summi Pontificis fuit exonerandi **fideles** ab obligatione Missam certis diebus audiendi, non vero pastores ab obligatione eam applicandi. Verba eisdem indulti diei 8 aprilis 1802 solos dispensant fideles. **Obligatio** igitur pastorum eadem ab eo tempore fuit quæ erat **antea**; id est, se extendit ad festa vi indulti supradicti suppressa et ad festa quorum solemnitas ad dominicam **proxime** occurrentem transfertur, non vero ad festa **anteriori** tempore suppressa.

4º Eadem obligatione tenentur **Papa** respectu totius Ecclesiæ, et episcopi respectu suæ **dioecesis**; curam enim in eminentiori gradu habent **animarum**: frequentius Missam pro populo offerre non **videntur** teneri, propter Constitutionis Bened. XIV auctoritatem, quamvis plures docuerint eos ad quotidiam applicationem teneri. Sic *Ferraris, v<sup>o</sup> Missæ sacrif., art. 3, n. 13*; S. Ligoriūs, l. 6, n. 327, etc.

5º Praelati et superiores monasteriorum regularium quotidie, sicut canonici, Missam **conventualem** pro fratribus sibi subditis, et simul pro **benefactoribus** in genere, celebrare debent. Habent enim curam animarum, et, sub hoc respectu, vi Constitutionis Bened. XIV ad applicationem in diebus dominicis et festivis reducuntur: sub alio respectu, capitulis et collegiatis assimilari debent. Itaque Missa conventualis **quotidie** videtur applicanda **benefactoribus** in genere, nisi, ob nimiam pauper-

tatem, obtenta fuerit dispensatio a Congr. Con cil. juxta quod dicit Bened. XIV, Const. citata, n. 19.

Nullibi invenire potuimus capellanos monialium, confraternitatum, sæcularium congregationum, militum, collegiorum et seminariorum præpositos Missam diebus dominicis et festivis applicare teneri. De facto illam apud nos non applicant, nisi id speciali conventione fuerit sancitum, et recte judicatur eos ad talem applicationem non teneri.

6º S. Ligoriūs, l. 6, n. 327, cum pluribus aliis doctribus quos se consuluisse affirmat, docet parochos et episopos infirmos, vel aliter a celebratione impeditos, obligationem habere Missam diebus dominicis et festivis per alium pro populo offerendi; quia onus illud non est tantum personale, sed reale ut onus prædicandi et sacramenta ministrandi, ac consequenter per alium impleri potest et debet. Hinc parochus, cui datur vicarius ob ipsius infirmitates, retributiones consuetas pro Missis parochialibus a vicario applicandis, solvere debet, seclusa speciali alia conventione.

7º *Sequitur ex dictis* 1º episcopos, parochos aliosque curam animarum habentes, teneri ex justitia supplere Missas diebus dominicis et festivis correspondentes, quæ, a tempore suæ institutionis vel commissionis, omissæ fuissent, quacumque ex causa; 2º tenuitatem redditum ab illa obligatione non liberare, nec totam redditum suppressionem, dum titulus cui annexa est cura animarum retinetur: unde Pius VI, hac de re consultus a sacerdotibus Gallicanis in Hispania exsulibus, respondit eos ad applicationem Missæ diebus dominicis et festivis adhuc teneri; sed, facultate dispensandi utens, onus illud ad aliquot Missas reduxit; 3º ipsam parochiale Missam, cui scilicet convocantur parechiani, applicandam esse, et non aliam, sine dispensatione episcopi ob gravem causam concessa: qui ergo alium pro se substituit sacerdotem, quod apud nos fieri potest, saltem ex consuetudine, et ab ipsa S. Rit. Cong. admissum videtur, ex responsionibus diei 27 febr. 1847 et 22 juli 1849 (*Gar-*

*dell.*, t. viii, p. 468 et 494), curare debet ut Missa pro subditis offeratur; et qui talem accipit delegationem, eo ipso censetur promittere se applicaturum Missam parochianis: haec regula tenenda est etiam in festis reductis et translatis, cum, ex decisionibus iteratis summi Pontificis, Missa in his diebus sit applicanda. In cathedralibus, quando episcopus pontificaliter celebrat, nihilominus tenetur hebdomadarius Missam applicare. Ita S. Rituum Cong. die 12 nov. 1831; *Gardell.*, t. viii, 116. Eadem tenetur obligatione parochus quando episcopus Missam parochiale celebrat: ratio est quia episcopus singularis diebus dominicis et festivis applicationem Missæ debet toti dioecesi. 4º Vicarius qui, ex commissione episcopi, moriente parocho, directioni parochiae ad tempus præponitur, jura parochi casualia percipit; sed Missam parochianis applicare teneri videtur ex encyclica Bened. XIV, diei 19 aug. 1744, § 4 (*Bull.* t. i, p. 163). Res tamen non est certa, et iudicio episcopi relinquenda est. 5º Qui ecclesiæ annexæ vel capellæ vicariali deservit, et cuncta parochi munia respectu fidelium sibi commissorum implet, eo ipso Missam parochiale applicare debet: non item qui affixus est capellæ vulgo dicta *auxiliaire*, in qua nonnullas tantum functiones sacras dependenter a parocho exercere potest, nisi aliter expresse fuerit conventum. 6º Qui duas habent parochias, et duas Missas singulis diebus dominicis et festivis celebrant, utramque pro respectivis parochianis offerre tenentur: sic responsum fuit a S. Congr. Concil. re ad ipsam delata, et recenter ea decisio ab ipsa confirmata est in responsive altera ad DD. archiepiscopum Auxitanum directa, die 8 juli 1843. Non tenentur vero illi qui unam habent parochiam et annexam sibi subjectam, quia parochia et annexa non faciunt duas parochias; nec illi qui, ut in dioecesi nostra, vacanti parochiæ vicina invigilare, et quosdam actus, nempe bannorum publicationes, matrimonia et sepulturas exercere jubentur; cura enim illius parochiæ, stricte loquendo, ipsis non committitur.

E Roma nobis responsum est, licet non in forma au-

thentica, parochos ad pia spiritualiscessus exercitia vocatos ab episcopo, eo ipso exemptos esse ab obligatione applicandi Missam parochianis dominica intra dies pro secessu assignatos occurentes. Hoc responsum non damus ut regulam omnino certam.

8º Parochi et vicarii ecclesiæ præpositi, tres Missas in die Nativitatis Domini ad utilitatem populi celebrare probabilius tenentur: id docet Bened. XIV, l. 3, cap. 9, in fine; sed definire non audet an tres Missas vel unam tantum applicare teneantur; idem movet et non solvit dubium de obligatione canonicorum in cathedralibus et collegiatis, non solum pro festo Nativitatis, sed pro aliis diebus in quibus, ex rubricis, plures celebrandæ sunt Missæ. Auctor Dissertationis insertæ in Ephemeride Romæ publicata sub titulo *Correspondance*, diei 14 decemb. 1848, expresse docet unam tantum applicandam esse Missam die Nativitatis, sicut unam ex præcepto esse audiendam, et talis est, ut nobis videtur, generalis persuasio.

#### ARTICULUS QUARTUS.

##### DE STIPENDIO ET OBLIGATIONIBUS EX ILLO NASCENTIBUS.

Dicemus 1º de ejus origine et legitimitate; 2º de ejus quantitate et ad alios transmissione; 3º de modo satisfaciendi pro illo; 4º de Missis fundatis et earum reductione.

§ I. — De origine et legitimitate stipendi pro missa.

1º Sicut in veteri Lege magna pars hostiarum cedebat in usum sacerdotum et levitarum, sic in primis Ecclesiæ sæculis mos fuit ut quotquot ad Missarum solemnia convenirent, suam sacrificii partem, id est panem et vinum consecrandum, offerrent: subdiaconi oblationes fidelium colligebant vel suscipiebant, et tantum de illis super altare ponebant quantum populo communicaturo sufficere posset; et quoniam unusquisque, pro sua facultate, plures sæpe offerebat panes, cum larga vini amphora, ut

ait Bened. XIV, l. 3, cap. 21, exigua pars consecrabatur, et reliqua massa sacerdotibus ac clericis cedebat.

Qui non offerebant, graviter increpabantur. « Locuples et dives es, et dominicum te celebrare credis, quæ in dominicum sine sacrificio venis, quæ partem de sacrificio quod pauper obtulit, sumis : » sunt verba S. Cypr. feminam divitem allocutus, lib. de Opere et Eleem. Sic omnes fideles aliquo sensu recte dicebantur sacerdotes ; quia panem et vinum offerentes, ad sacrificium altaris concurrebant.

2º Canon 3 Apostolorum prohibuerat ne aliud præter panem et vinum ad altare offerretur : excepta tamen fuerunt novæ spicæ, uvæ, oleum ad luminaria et thymania. Cæteri fructus, quos fideles offerre volebant, mittebantur ad episcopum et presbyteros, per quos diaconis et aliis clericis distribuebantur.

In die Paschatis, suscipere licebat mél et lac, de quibus sacro fonte egressis aliquid dandi mos erat.

3º Postea statutum fuit ut ad offertorium Missæ nihil præter panem et vinum offerretur, et soli jus communionis habentes ad oblationem præstandam admitterentur, videlicet clerici, laici, viri ac mulieres, principes et plebeii ; non vero excommunicati, catechumeni, energumeni, pœnitentes et alii quibus sacra communio denegabatur. Ea autem quæ clericorum usibus destinabantur, ante Missam vel saltem ante evangelium aut immediate post evangelium erant offerenda : vide P. Martène, de antiquis Eccl. Rit. l. 1, cap. 4, art. 6, modum suscipiendo oblationes describentem ; et card. Bona, Rerum Liturg. l. 2, cap. 9.

4º An in primis sæculis pecunia, sicut res aliæ, ad altare oblata fuerit non constat. Bened. XIV dicit hoc nobis ignotum esse, sed ab ipsis Ecclesiae incunabulis in singulis Christianorum ecclesiis expositam fuisse arcam, quam Baronius, ad an. 44, n. 69, gazophylacium appellat, in quam pecunia a fidelibus inferebantur. Illius arcæ meminerunt Tertul., Apol. cap. 39; S. Just., Apol. I, n. 67; S. Aug., S. Paulinus, etc.

5º Duodecimo sæculo, teste Honorio Augustodunensi, in Gemma animæ, de antiquo Ritu Missæ, l. 1, cap. 66, Bibl. Patr., t. xx, vetus jam existebat consuetudo, *ut populus pro oblatione farinæ denarios offerret*. Antea sacerdotes e singulis domibus vel familiis accipiebant farinam, ex qua fiebat panis consecrandus. Ignoramus autem quo præcise tempore hæc consuetudo incœperit. Chrodegangus, episcopus Metensis, in medio octavi sæculi canoniconum institutor, in sua Regula, cap. 32, unicuique canonico sacerdoti permittit ut eleemosynam pro Missa oblatam accipiat, et exinde quod voluerit faciat ; in undecimo sæculo Joannes, auctor Vitæ S. Petri Damiani, narrat, cap. 2, eum adhuc puerulum, cum invenisset nummum, et mente revolveret quid eo mercari posset, divinitus inspiratum dixisse : « Melius est ut tradam presbytero, qui Deo sacrificium offerat pro patre meo defuncto. »

6º Quamdiu voluntariæ populi oblationes sufficietes fuerunt, et ad Sacrificium, et ad honestam clericorum sustentationem, Missæ omnibus in communi applicatae fuerunt nisi ageretur de mortuis Deo commendandis, ut patet exemplo matris S. Aug.

Sed pietate fidelium decrescente, rarae fuerunt communiones, et adeo exiguae factæ sunt oblationes, ut nec clericorum sustentationi, nec sæpe ipsi Sacrificio sufficerent : hinc nata est consuetudo primo tolerata, deinde positive approbata, ut fideles Missam pro seipsis, vel pro alia persona vivente aut mortua a se designata, peculiariter offerri postularent, aliqua eleemosyna ante vel post Missam præstata.

7º Hæc autem eleemosyna, quæ vulgo et quidem melius dicitur stipendium vel honorarium Missæ, recta intentione dari et accipi debet : si haberetur quippe ut divini Sacrificii pretium, grande foret simoniae scelus, in eo præcise consistsens, quod res spiritualis re temporalis æstimetur. Solo igitur sustentationis titulo dari et accipi potest. Unde S. Th., 2 2, q. 100, art. 2, ad 2<sup>um</sup>, ait : « Sacerdos non accipit pecuniam quasi pretium

» consecrationis Eucharistiae, aut Missæ decantandæ, hoc  
» enim esset simoniacum ; sed quasi stipendium suæ  
» sustentationis. »

8º Negari non potest stipendium sic spectatum esse  
licitum. Nam 1º Christus dixit, apud Matth. x, 10 : *Dignus est operarius cibo suo* ; et B. Paulus, I Cor. ix, 13 : *Qui altari deserviunt, cum altari participant*. Unde con-  
cluditur sacerdotem ex altari vivere posse, id est habere  
jus ut fideles, occasione sacri ministerii, ea præstent  
quaæ ad ejus sustentationem necessaria sunt. 2º Totius  
Ecclesiæ praxis erronea esse non potest : at in tota  
Ecclesiæ, saltem a duodecimo sæculo, dantur et accipiun-  
tur stipendia pro Missis. Ergo.

Cum Ecclesia inter sacerdotes divites et pauperes non  
distinguat, omnes stipendia consueta accipere possunt,  
quia omnes æquale jus habent ex altare vivendi. Sti-  
pendia pro aliis sacramentis similiter accipere liceret,  
si Ecclesia permetteret : secus, simonia esset.

§ II. — De quantitate stipendi et ejus ad alios transmissione.

1º Non dissimulandum est rem in se bonam, ex abusu  
mox factam esse scandalorum fomitem : multi namque  
sacerdotes, turpis lucri gratia ducti, eleemosynas pro  
Missis colligere coeperunt, et modo plures Missas eodem  
die celerabant, modo tres aut quatuor incipiebant Mis-  
sas usque ad offertorium ; deinde, unico facto offertorio,  
tres aut quatuor dicebant collectas, postea unum cano-  
nem, unam consecrationem, unam communionem, et  
tres aut quatuor communiones et postcommuniones ; alii  
tot offerebant et consecabant hostias quot acceperant  
eleemosynas, vel quot erant Missæ promissæ ; alii crede-  
bant se pro multis stipendiis per unicam Missæ celebra-  
tionem satisfacere posse, quia pretium Sacrificii est infi-  
nitum ; alii denique de stipendiis pro Missis turpiter  
paciscebantur, quasi de vilissimæ rei pretio actum esset.

Ut gravissima hæc mala de medio tollerentur, concilium  
Toletanum, anno 1324 celebratum, strictissime  
prohibuit, cap. 6, ne ullus sacerdos quidquam vel mini-

mum pro Missa exigeret, sed eleemosyna sponte oblata  
contentus esset. Malo adhuc perseverante, concilium  
Trid., sess. 22, decreto de Observ. et Evit. in celebra-  
tione Missæ, injunxit episcopis ut illud omnino tolle-  
rent, addens : « Ut multa paucis comprehendantur, in  
» primis, quod ad avaritiam pertinet, cuiusvis generis  
» mercedum conditiones, pacta et quidquid pro Missis  
» novis celebrandis datur, nee non importunas atque  
» illiberales eleemosynarum exactiones potius quam pos-  
» tulationes, aliaque hujusmodi quaæ a simoniaca labe vel  
» certe a turpi quæstu non longe absunt, omnino prohi-  
» beant. »

2º Episcopi autem scandala hujus generis auferre non  
potuerunt in radice, nisi taxando in sua respectiva diœ-  
cesi stipendum ultra quod nemo quidquam exigere pos-  
set. Wilhelmus, archiepiscopus Eboracensis, hujusmodi  
taxam ante concilium Trident. jam præfixerat ; post  
concilium Trid. omnes episcopi similiter egerunt, et nunc  
nulla est diœcesis in qua specialis non existat index ele-  
mosynarum pro functionibus sacris, et maxime pro Mis-  
sis celebrandis, solvendarum.

3º Quantitas taxationis omnino relinquitur arbitrio  
episcopi, qui eam, vel in synodo, vel extra synodum,  
juxta prudentiam suam, determinat, habita ratione cir-  
cumstantiarum, loci, temporis, antiquarum consuetudi-  
num, etc.

Illa taxatio vim legis non habet in foro civili apud  
nos, nisi approbatione principis muniatur.

4º Nullus sacerdos, sive sæcularis, sive regularis, ali-  
quid supra taxationem, sub quocumque prætextu, exi-  
gere potest, et exigendo, non solum contra mandatum  
Ecclesiæ, sed contra justitiam peccaret, et ad restitutio-  
nem obligaretur : hoc quippe augmentum evidenter  
absque titulo proprietatis transmissivo possideret.

5º Non prohibentur tamen regulares aut sæculares  
uberiorem stipem a sponte offerentibus accipere, modo  
absit dolus et quodcumque pactum etiam implicitum.  
Sic Suarez, card. de Lugo, Bened. XIV, l. 3, cap. 21,